


Con pa trece tur elemento hunto pa miho sinergia urbano

Egbert Perry di "The Integral Group LLC" t'e keynote speaker cerando Green Aruba VI

E ORGANISADORNAN di Green Aruba tin e honor di anuncia Egbert Perry di The Integral Group LLC como e "closing keynote speaker" di e conferencia cu ta tuma lugar riba dianan 27 y 28 di october.

Egbert Perry t'e Chairman y CEO di e compania "Integral", cu ta un lider y inovador den e ramo di urbanisacion.

Perry a nace na Antigua &



Barbuda y na 1970 a emigra pa Merca, unda cu el a completa su scol secundario y universidad. E tin titulonan "undergraduate" y "graduate" den ingenieria, finansa y contabilidad. El a ocupa e funcion di presidente di un compania di real estate y construccion chikito, cu el a logra comberti den un di e top companianan na Merca.

Egbert Perry ta co-fundado di Integral, cual a wordo estableci na 1993. The Integral Group LLC ta un lider y inovador den e ramo di re-utilisacion y reposicionamento di areanan grandi cu ta wordo desaroya di nobo pa crea comunidatnan di ingreso mixto cu ta sano y sostenibel den henter Merca. Perry su trabou a wordo uza como modelo nacional pa inovacion urbano den desaroyo di comunidad, real estate comercial y revitalisacion di barionan.

E compania actualmente ta un compania di desaroyo integral y inversion vertical

y horizontal. Integral tin su oficina principal na Atlanta, Georgia, e tin oficina den cinco ciudad Mericano, y proyectonan y inversionnan den mas di 15 ciudad.

"Tanten cu tin un cantidad di areanan unda cu obviamente sostenibilidad di medioambiente por wordo desaroya exitosamente, mi enfoka ta mas riba otro formanan di sostenibilidad, particularmente relaciona na e re-utilisacion di tereno y preservacion di e bienes di e terenonan den e region,"

Egbert Perry ta observa. E ta agrega, "E reto mas grandi pa alcansa e obhetivo aki ta relaciona di cerca cu e fragilidad economico di e nacionnan den e region. E vision di termino largo cu un desaroyador "responsabel" mester tin, acopla cu mi raisnan Caribense, ta yuda forma mi perspectiva den e area di sostenibilidad, particularmente p'e islanan chikito den Caribe."

Egbert Perry su participacion na Green Aruba VI lo ofrece un perspectiva diferente di e situacion di transicion esencial cu Aruba ta pasando aden den e proceso di eliminacion di fuentenan di energia fosil pa produccion di coriente y di awa potabel. Perry, cu su conocimiento y experticio den e ramo di transicion y reposicionamento, como tambe diseño di arenan urbano, lo contribui sigur n'e combersacion, y accionnan y decisionnan clave, andando for di 2009 na Aruba, di con pa trece tur e elementonan hunto pa miho sinergia den e diseño di e isla.